

VENDIM
Nr. 118, datë 3.6.2025

MBI NJË NDRYSHIM NË VENDIMIN E BORDIT TË ERE-s NR. 283, DATË 18.12.2024, “MBI LICENCIMIN E SHOQËRISË ‘MOUNTAIN’S GREEN ENERGY’ SHPK, NË VEPRIMTARINË E PRODHIMIT TË ENERGJISË ELEKTRIKE”

Në mbështetje të nenit 16 të ligjit nr. 43/2015, “Për sektorin e energjisë elektrike”, të ndryshuar; nenit 113 të ligjit nr. 44/2015, “Kodi i Procedurave Administrative të Republikës së Shqipërisë”; si dhe nenit 15 të “Rregullores për organizimin, funksionimin dhe procedurat e ERE-s”, miratuar me vendimin e Bordit të Entit Rregullator të Energjisë (ERE) nr. 96, datë 17.6.2016; Bordi i ERE-s, në mbledhjen e tij të datës 3.6.2025, mbasi shqyrtoi relacionin e përgatitur nga Drejtoria e Politikave të Burimeve të Rinovueshme me nr. 1740 prot., datë 2.6.2025, “Mbi ndryshimin e vendimit të Bordit të ERE-s nr. 283, datë 18.12.2024, “Mbi një ndryshim në vendimin e Bordit të ERE-s nr. 283, datë 18.12.2024, ‘Mbi licencimin e shoqërisë ‘Mountain’s Green Energy’ sh.p.k., në veprimtarinë e prodhimit të energjisë elektrike nga centrali fotovoltai, me kapacitet të instaluar 1 975 kw””,

konstatoi se:

1. Të dhëna mbi shoqërinë “Mountain’s Green Energy” sh.p.k.

- Bordi i ERE-s me vendimin nr. 283, datë 18.12.2024, ka miratuar licencimin e shoqërinë “Mountain’s Green Energy” sh.p.k. në veprimtarinë e prodhimit të energjisë elektrike nga centrali fotovoltai me kapacitet të instaluar 1 975 kw, me vendndodhje në Gomsiqe, Bashkia Vau i Dejës, për një afat 30-vjeçar. Vendimi parashikon që, përpara fillimit të operimit, shoqëria të dokumentojë testimin e veprës pranë ERE-s dhe se vendimi mund të rishikohet në funksion të këtij plotësimi.

2. Korrespondenca dhe dokumentacioni i depozituar nga shoqëria

- Shoqëria “Mountain’s Green Energy” sh.p.k., me shkresën nr. ekstra prot., datë 21.5.2025, protokolluar në ERE me nr. 1740 prot., datë 21.5.2025, ka paraqitur pranë ERE-s kërkesën për rishikimin e vendimit të Bordit të ERE-s nr. 283, datë 18.12.2024, në funksion të përmbushjes së detyrimit të përcaktuar në pikën 2 të këtij vendimi.

- Në kuadër të plotësimit të këtij kushti, shoqëria ka përcjellë dokumentacionin përkatës, përfshirë: procesverbalin e përfundimit të punimeve, të datës 15.12.2024; aplikimin për pajisje me certifikatën e pranimit të veprës, drejtuar Agjencisë Kombëtare të Burimeve Natyrore (AKBN), me shkresën e datës 17.2.2025, protokolluar në AKBN me nr. 1028 prot., datë 18.2.2025; si dhe raportin e testimit të veprës, të kryer nga vetë shoqëria “Mountain’s Green Energy” sh.p.k.

3. Analiza ligjore dhe vlerësimi

- Në përputhje me nenin 10 të kontratës koncesionare nr. 9112 rep., nr. 3449 kol., datë 29.12.2017, të ndryshuar, ndërmjet autoritetit kontraktor dhe shoqërisë “Mountain’s Green Energy” sh.p.k., për ndërtimin, shfrytëzimin dhe administrimin e centralit fotovoltai “Gomsiqë” me kapacitet prodhues 1975 kw, në Bashkinë Vau i Dejës, qarku Shkodër, është parashikuar se procesi i testimit të veprës realizohet me pjesëmarrjen e autoritetit përgjegjës, që është Agjencia Kombëtare e Burimeve Natyrore (AKBN).

- Në kushtet kur brenda afatit të përcaktuar në pikën 3 të nenit 10 të kontratës, pas njoftimit zyrtar drejtuar AKBN-së me shkresën nr. 1028 prot., datë 18.2.2025, nuk është kryer testimi nga ana e autoritetit përgjegjës, testimi i veprës është realizuar nga vetë Mbajtësi i Miratimit për Ndërtim, “Mountain’s Green Energy” sh.p.k., në bashkëpunim me sipërmarrësin e punimeve “Vega Energy” sh.p.k. dhe mbikëqyrësin e punimeve “Infinite R.S.” sh.p.k.

- Me e-mail-in e datës 30.5.2025, ERE i ka kërkuar shoqërisë “Mountain’s Green Energy” sh.p.k. informacion lidhur me zbatimin e detyrimeve të kontratës koncesionare, përkatësisht mbi njoftimin

e autoritetit kontraktor për qëllime testimi. Në përgjigje të këtij komunikimi shoqëria ka sqaruar, se bazuar në pikën 3 të nenit 10 të kontratës dhe në përputhje me VKM-në nr. 506, datë 1.8.2024, “Për disa ndryshime dhe shtesa në vendimin nr. 547, datë 9.8.2006, të Këshillit të Ministrave”, nëse pas 45 ditëve nga njoftimi zyrtar autoriteti përgjegjës nuk kryen testimin, vepra konsiderohet e testuar.

- Përveç dokumentacionit të mësipërm, shoqëria ka përcjellë pranë ERE-s me shkresat e protokolluara me nr. 1740/1 prot., dhe nr. 1740/2 prot., datë 29.5.2025, edhe testimin 72-orësh të realizuar nga OSSH sh.a., bazuar në shkresën nr. 4607/5 prot., datë 19.5.2025, me lëndë “Mbi dhënien e tensionit për qëllime testimi me ngarkesë në rrjetin e transmetimit të linjës 35 kV”, procesverbalin mbi vendosjen e matësit të datës 22.5.2025, si dhe kërkesën për lidhje përfundimtare me rrjetin e linjës 35 kV për centralin fotovoltaik “Mountain’s Green Energy” sh.p.k., me kapacitet 1975 kw.

4. Nevoja për ndryshimin e vendimit

- Në funksion të sa parashtruar më sipër, vlerësohet se kushti i vendosur në pikën 2 të vendimit të Bordit të ERE nr. 283, datë 18.12.2024, “Mbi licencimin e shoqërisë ‘Mountain’s Green Energy’ sh.p.k. në veprimtarinë e prodhimit të energjisë elektrike”, është përmbushur nga ana e shoqërisë “Mountain’s Green Energy” sh.p.k., dhe si i tillë duhet të shfuqizohet nga Enti Rregullator i Energjisë.

- Në rast se MIE do të ketë kundërshtime lidhur me procedurën e ndjekur nga shoqëria “Mountain’s Green Energy” sh.p.k. lidhur me njoftimin për testimin e veprës, pika 3 e vendimit të Bordit të ERE-s nr. 283, datë 18.12.2024, ka parashikuar rishikimin e këtij vendimi.

- Bazuar në nenin 113 të ligjit nr. 44/2015 “Kodi i Procedurave Administrative të Republikës së Shqipërisë”, ku përcaktohet se një akt administrativ mund të anulohet, apo shfuqizohet, kryesisht nga organi publik që ka kompetencë të nxjerrë aktin, nga organi i tij epror apo nga një organ tjetër i parashikuar shprehimisht me ligj, vlerësojmë që pika 2 e vendimit të Bordit të ERE-s nr. 283, datë 18.12.2024, duhet të shfuqizohet pasi shoqëria “Mountain’s Green Energy” sh.p.k. ka përmbushur kushtin e vendosur nga ERE.

Për gjithë sa më sipër, Bordi i ERE-s

VENDOSI:

1. Pika 2 e vendimit të Bordit të ERE-s nr. 283, datë 18.12.2024, shfuqizohet.

2. Drejtoria e Politikave të Burimeve të Rinovueshme të njoftojë shoqërinë “Mountain’s Green Energy” sh.p.k., Ministrinë e Infrastrukturës dhe Energjisë, FTL sh.a., OSSH sh.a. lidhur me vendimin e Bordit të ERE-s.

Ky vendim hyn në fuqi menjëherë.

Çdo palë e përfshirë në këtë procedurë mund t’i kërkojë ERE-s, brenda 7 ditëve kalendarike nga data e marrjes dijeni, rishikimin e vendimit të Bordit, në rast se ka siguruar prova të reja që mund ta çojnë bordin në marrjen e një vendimi të ndryshëm nga i mëparshmi, apo për gabime materiale të konstatuara. Për këtë vendim mund të bëhet ankim në Gjykatën Administrative Tiranë, brenda 30 ditëve kalendarike nga dita e publikimit në Fletoren Zyrtare.

Ky vendim botohet në Fletoren Zyrtare.

KRYETAR
Petrit Ahmeti